

REGULAMENTO DA MATRÍCULA CONDICIONADA EN MÁSTERES UNIVERSITARIOS OFICIAIS DA UNIVERSIDADE DA CORUÑA

O Consello de Goberno da Universidade da Coruña, na súa reunión do 23/03/2015, aprobou un procedemento extraordinario de preinscrición en másteres universitarios que lle permite, unicamente ao alumnado da propia universidade, facer a preinscrición no último prazo, sen ter o título de grao, sempre e cando tivese pendentes de superar, ademais do Traballo Fin de Grao (a partir de agora TFG), un máximo de 12 créditos de materias ou 18 de prácticas, aínda que esta norma só autoriza a admisión nos estudos, e dilata o momento da matrícula ata que a persoa solicitante obteña o título que lle permite o acceso ao Máster.

O artigo 18.4 do Real decreto 822/2021, do 28 de setembro, polo que se establece a organización das ensinanzas universitarias e do procedemento de aseguramento da súa calidade, permite a matrícula condicionada nos másteres universitarios para aquel alumnado a que lle falte por superar o TFG e un máximo de 9 créditos, para o cal lles esixe ás universidades a aprobación de normativas específicas por parte dos seus órganos de goberno.

A regulación contida no artigo 18.4 do Real decreto 822/2021, do 28 de setembro, permite formalizar a súa matrícula ao alumnado de calquera universidade española que cumpra os límites antes mencionados, aínda que esta matrícula ten o carácter de condicionada e non se poderá emitir o título de máster ata que a persoa interesada non obteña o correspondente título de grao. Pola contra, a precitada normativa propia da UDC autoriza a preinscrición, coas limitacións indicadas, só ao alumnado desta universidade.

Tendo en conta a regulación recollida no Real decreto 822/2021, así como o interese da Universidade da Coruña en permitir que o alumnado, que non finalizou os seus estudos de grao por ter pendente un número reducido de créditos, teña a oportunidade de continuar de forma inmediata a súa formación cursando un máster universitario, apróbase este Regulamento da matrícula condicionada en másteres universitarios oficiais da Universidade da Coruña.

Artigo 1. Obxecto e ámbito de aplicación

1. O obxecto deste Regulamento é establecer o procedemento para a matrícula condicionada nos estudos de máster universitario da Universidade da Coruña (a partir de agora UDC), de acordo co disposto no artigo 18.4 do Real decreto 822/2021, do 28 de setembro, polo que se establece a organización das ensinanzas universitarias e do procedemento de aseguramento da súa calidade.
2. Poderase levar a cabo a matrícula condicionada en todos os másteres universitarios oficiais ofertados pola UDC que se encontren na situación recollida no artigo 3.1 deste regulamento, excepto nos seguintes:
 - a) Máster Universitario en Avogacía
 - b) Máster Universitario en Profesorado de Educación Secundaria Obrigatoria e Bacharelato, Formación Profesional e Ensino de Idiomas
 - c) Másteres cuxa Comisión Académica comunique, mediante un escrito motivado dirixido á vicerreitoría competente en materia de títulos oficiais, a conveniencia de excluír a dita posibilidade. En caso de discrepancia entre a Comisión Académica e a vicerreitoría competente, decidirá o Consello de Goberno da Universidade.

Código Seguro De Verificación	S1oEV3PYhtHBOWG5F1TP5g==	Estado	Data e hora
Asinado Por	Secretario xeral - Carlos Ignacio Aymerich Cano	Asinado	26/01/2023 12:11:04
Observacións		Páxina	1/4
Url De Verificación	https://sede.udc.gal/services/validation/S1oEV3PYhtHBOWG5F1TP5g==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		



Esta comunicación deberase remitir antes do 30 de marzo, e o seu sentido manterase en cursos sucesivos ata que solicite o seu cambio a dita Comisión Académica.

Artigo 2. Requisitos das/dos solicitantes

Poderán solicitar a matrícula condicionada nun máster universitario oficial da UDC, as/os estudantes que, estando a cursar un título oficial de grao do sistema universitario español, se encontren, polo menos, nunha das seguintes situacións na data de finalización do correspondente prazo de preinscrición:

1. Ter pendentes de superación o TFG e, como máximo, 9 créditos ECTS. Para os efectos do cómputo destes 9 créditos, entenderanse como non superados os pendentes de recoñecemento.
2. Ter pendente de obter a acreditación da competencia lingüística no idioma estranxeiro que, de ser o caso, lles esixa a súa universidade de orixe.

Artigo 3. Solicitudes e resolución

1. As/os estudantes que se acollan a esta posibilidade unicamente poderán presentar a súa solicitude de admisión no segundo e terceiro dos prazos do procedemento ordinario de preinscrición que aprobe a UDC e, exclusivamente, nos másteres en que queden prazas vacantes tras a resolución das solicitudes do primeiro prazo do dito procedemento ordinario.
2. Este estudiantado deberalle xuntar á súa solicitude de preinscrición a seguinte documentación:
 - a) Unha copia do DNI ou pasaporte (con fotografía) en vigor, e NIE, de ser o caso.
 - b) Unha certificación académica persoal en que figure a nota media obtida de acordo co que está recollido no Real decreto 1125/2003, do 5 de setembro (no caso dos estudantes da UDC bastará unha copia do seu expediente, obtida a través da Secretaría Virtual do Estudiante).
 - c) A certificación da universidade de orixe en que se indique o número de créditos que restan para finalizar os estudos de grao, sempre que este dato non figure expresamente recollido no documento indicado na letra anterior (este documento non se lles esixe ás/aos solicitantes da UDC).
 - d) O xustificante de matrícula, no mesmo curso académico en que vai cursar os estudos de máster, dos créditos pendentes de superación para obter o título de grao correspondente.
3. No prazo correspondente, as/os estudantes que se acollan a este procedemento serán ordenados/as pola respectiva Comisión Académica, sempre a continuación dos que sexan titulados/as, de acordo coa seguinte orde de prelación:
 - a) Estudantes que unicamente teñan pendente de obter a acreditación da competencia lingüística en idioma estranxeiro que, de ser o caso, lles esixa a súa universidade de orixe. Ordenaranse pola súa nota de admisión ao máster e, en caso de igualdade, de acordo coa seguinte orde:
 - Nota media do expediente académico, no caso de ser diferente á nota de admisión.

Código Seguro De Verificación	S1oEV3PYhthBOWG5F1TP5g==	Estado	Data e hora
Asinado Por	Secretario xeral - Carlos Ignacio Aymerich Cano	Asinado	26/01/2023 12:11:04
Observacións		Páxina	2/4
Url De Verificación	https://sede.udc.gal/services/validation/S1oEV3PYhthBOWG5F1TP5g==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		





- Maior número de créditos con cualificación de matrícula de honra.
 - Maior número de créditos con cualificación de sobresaliente.
 - Maior número de créditos con cualificación de notable.
 - Data e hora de entrega na aplicación de preinscripción de toda a documentación correcta.
- b) Estudantes que teñan pendentes de superar unicamente o TFG (con independencia de se teñen pendente ou non a obtención da acreditación da competencia lingüística en idioma estranxeiro que, de ser o caso, lles esixa a universidade de orixe). Ordenaranse pola súa nota de admisión ao máster e, en caso de igualdade, de acordo coa seguinte orde:
- Nota media das materias superadas no grao, no caso de ser diferente á nota de admisión.
 - Maior número de créditos con cualificación de matrícula de honra.
 - Maior número de créditos con cualificación de sobresaliente.
 - Maior número de créditos con cualificación de notable.
 - Data e hora de entrega na aplicación de preinscripción de toda a documentación correcta.
- c) Estudantes que teñan pendentes de superar o TFG e ata 9 créditos ECTS (con independencia de se teñen pendente ou non a obtención da acreditación da competencia lingüística en idioma estranxeiro que, de ser o caso, lles esixa a universidade de orixe). Ordenaranse pola súa nota de admisión ao máster e, en caso de igualdade, de acordo coa seguinte orde:
- Menor número de créditos pendentes de superar (excluídos os correspondentes ao TFG).
 - Nota media das materias superadas no grao, no caso de ser diferente á nota de admisión.
 - Maior número de créditos con cualificación de matrícula de honra.
 - Maior número de créditos coa cualificación de sobresaliente.
 - Maior número de créditos coa cualificación de notable.
 - Data e hora de entrega na aplicación de preinscripción de toda a documentación correcta.
4. Tras ser admitidos, as/os solicitantes matricularanse de acordo co procedemento establecido con carácter xeral.

Artigo 4. Efectos da matrícula condicionada

1. As/os estudantes que realicen a matrícula condicionada terán os mesmos dereitos e obrigacións que as/os estudantes con matrícula ordinaria, excepto no que se refire á defensa do Traballo Fin de Máster (cuxa superación é imprescindible para a obtención do título), que non se poderá efectuar ata que non se acredite a obtención do título de grao correspondente.
2. A acreditación da obtención do título de grao unicamente se admitirá se se presenta algún dos seguintes documentos:

Código Seguro De Verificación	S1oEV3PYhtHBOWG5F1TP5g==	Estado	Data e hora
Asinado Por	Secretario xeral - Carlos Ignacio Aymerich Cano	Asinado	26/01/2023 12:11:04
Observacións		Páxina	3/4
Url De Verificación	https://sede.udc.gal/services/validation/S1oEV3PYhtHBOWG5F1TP5g==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		



- a) Título universitario oficial
 - b) Certificación supletoria do título
 - c) Certificación emitida pola universidade de orixe que acredite o cumprimento dos requisitos necesarios para a obtención do título de grao, acompañada do xustificante do pagamento dos dereitos de expedición no caso de que neste certificado non se indique que este pagamento foi efectuado.
3. Os estudantes de grao da UDC non están obrigados a acreditar a obtención do dito título, será suficiente a comunicación á Administración/UXAI responsable do máster, que levará a cabo as comprobacións necesarias.

Disposición adicional. Habilitación para o desenvolvemento e interpretación

Habilítase a vicerreitoría con competencias en materia de títulos oficiais para o desenvolvemento desta normativa, así como para a interpretación e resolución de cantas cuestións se expoñan na súa aplicación.

Disposición final. Entrada en vigor

A presente normativa será de aplicación ao curso académico 2023/24, tras a súa publicación no Taboleiro de anuncios da sede electrónica da UDC.

Dilixencia para facer constar que o presente documento foi aprobado polo Consello de Goberno na súa sesión do 26/01/2023
O secretario xeral

Código Seguro De Verificación	S1oEV3PYhtHBOWG5F1TP5g==	Estado	Data e hora
Asinado Por	Secretario xeral - Carlos Ignacio Aymerich Cano	Asinado	26/01/2023 12:11:04
Observacións		Páxina	4/4
Url De Verificación	https://sede.udc.gal/services/validation/S1oEV3PYhtHBOWG5F1TP5g==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		

